

ՈՒՆՏԱԳՆԱՑՈՒԹՅՈՒՆ ՍՈՒՐԲ ԵՐԿԻՐ

Մայիսի 23-ից մինչև հունիսի 2-ը, օրհնությամբ Նոր Նախիջևանի և Ռուսաստանի հայոց թեմի առաջնորդ Ս. Եզրաս եպիսկոպոս Ներսիսյանի, Վոլգոգրադի, Սուրբ Գևորգ եկեղեցու մի խումբ հայորդիներ, առաջնորդությամբ հոգևոր հովիվ Տեր Մաղաքիայի, ուխտի գնացին Երուսաղեմ՝ Սուրբ քաղաք:

Տասն օրերի ընթացքում Վոլգոգրադի հայ ուխտավորները եղան մեր Փրկչի տնօրինական գրեթե բոլոր սրբավայրերում:

Մայիսի 25-ին՝ Երևման Սուրբ Խաչի տոնին, Սրբոց Հակոբյանց վանքում մասնակցեցին Սրբազան Պատարագին:

Ուխտավորներին առաջնորդող Վոլգոգրադի հայոց հոգևոր հովիվ Տեր Մաղաքիան Պատարագ մատուցեց Բեթղեհեմի Սուրբ Ծննդյան տաճարում, Սուրբ Լույս Մարիամի գերեզմանին՝ Վերափոխման տաճարում և Փրկչի գերեզմանին՝ Սուրբ Հարության տաճարում:

Ուխտավորները եղան նաև Հորդանան գետում, որտեղ մկրտվել էր Աստվածորդին, բարձրացան Թաբոր լեռ, իրենց աղոթքը վերառաքեցին առ Աստված Համբարձման լեռան վրա, եղան Աստվածամոր ննջման եկեղեցում, «Հայր Մեր»-ի եկեղեցում, ուր ուրախությամբ տեղեկացան, որ 300 լեզուներով գրված «Հայր մեր» աղոթքի շարքում հայերենը զբաղեցնում էր երրորդ տեղը՝ լատիներենից և արաբերենից հետո:

Հայ ուխտավորները առիթ ունեցան լինելու նաև Գալիլիա ծովակի վրա, Մեռյալ և Միջերկրական ծովերում, Նազարեթ, Յաֆֆա, Երիքով, Հոպպե և Թել-Ավիվ քաղաքներում:

Ուխտավորներին իր օրհնությունը բաշխեց Երուսաղեմի Հայոց Պատրիարք Ս. Թորգոմ արքեպիսկոպոս Մանուկյանը:

Ողջ ուխտագնացության ընթացքում Վոլգոգրադի ուխտավորներին ուղեկցում էին Երուսաղեմի Հայոց պատրիարքության հոգևոր հայրերը:

Հունիսի 2-ին ուխտավորները վերադարձան Վոլգոգրադ՝ զորացած հավատքով և լի անմոռաց տպավորություններով:

*ՆՈՐ ՆԱԽԻՋԵՎԱՆԻ ԵՎ ՌՈՒՍԱՍՏԱՆԻ
ՀԱՅՈՑ ԹԵՄԻ ՄԱՍԼՈ ՂԻՎԱՆ*